

靜
廉
齋
詩
集

靜廉齋詩集卷八

仁和金 牲雨叔

御製吉林土風雜詠有羅丹一首 皇四子於拜 賜

日分貽五枚謹賦志謝 壬午

土風傳吉林 睿藻重前迹厥戲有羅丹亦名曰帕格
取材解鹿腕拾塊碎虹璧局合擬重圍手按同五白偃
仰杯琰開橫側鼎耳革采分四面現勝本一擲獲旣添
呼盧興仍倣彈棊劇位置約相當抨擊遣交迫旁衝留
塞道巧抵慣乘隙或誇拏攫便旋趁翻覆易弄丸乍跳
空收果不遺碩遠投追礮中滑迸犯冰坼驚絕口爲咤

歡濃笑惟啞微參僻脫勢良助驍騰益心精通擗闔拳
捷衛肘腋寧隨六博進徒計千金責宸襟深寄託玩
物含膏澤寵賚傷牙籤連排疑玉尺侍書欣初見廣惠
慰奇癖才慚呂溫賦寶勝充宗石

御製題注羅丹鹿蹄腕骨也舊俗以蹄腕骨隨手攤
擲爲戲視其偃仰橫側爲勝負小者以聲大者以鹿
瑩澤如玉兒童婦女圍坐擲以相樂以薄圓石擊之
則曰帕格又御製詩注腕骨一具四面各不同持
四枚擲之各得一色則爲四色全大約以此分勝負
一手攤擲承空上下各取之以不動局上者爲工婦
女多能之非男子事也又有較遠
之戲趨冰上以中爲勝名曰撒罕

謹按羅丹俗名背式骨每一具可四可五其戲以
四面分四采其采亦倣二對三渾四聚不同之例
視采以定勝負實與樗蒲相類采有未判則打馬
以決之惟采對者得打所打又必激成別采輾轉

抨擊始定自擲自打聽對局者先摘去一枚摘者必故留隔礙以困之而能手乃因難見巧是又兼有雙陸彈碁遺意擲時或先摘其一拋置手背旋拾餘馬而在背者帖然或揪在背者於空中先掠餘馬而還接其一則弄丸之巧不是過矣至就冰上遠投則軍中投石與演習冰嬉皆寓於此又不

可徒以戲事自之也其采名與勝負多寡之算不復顧縷云

陶然亭遇同年孫鍾柏

夢達

主事暨錢坤一載庶

子夏更生

蘇

進士皆至遂同過愍忠寺柬孫邀

和

蠲疾何須覓桂膏良朋選勝瞥相遭望衡早逐車塵散

三君皆同巷

繞塔同依松蓋高

觀遼壽昌五年所立陀羅尼尊勝幢

爲避越人

盟戴笠

亭上方有社集

更尋羅漢認垂條興公應倡蘭亭詠莫

負停雲蔭九皋

末五字孫綽蘭亭句

皇四子以

牲

出郊問疾辱和陶然亭韻見寄疊韻

奉答

炙輠猶能出賸膏郊園振策喜周遭誰云被禊情偏暢
祇覺玲瓏調轉高

承以三疊玲瓏
山七古見示

識路馬方尋舊跡催

花鼓欲理新條驚才風逸難追步避席相如請用皋

皇四子以西園養疾用查夏重和黃晦木卜居河

渚十首韻述懷見示病餘多感雜綴無章依韻

奉呈略申衷款

蒲柳先秋葉半黃塵容猶記走蹢躅太倉幸竊盈囊粟

故里誰營東版牆，自分利名心蚤淡。幾時筆墨債全償，
小詩一卷空標目。今雨難尋舊草堂。

廿載荆枝判死生，松阡遙望客心驚。兒童長大愁難識，
城郭依稀夢獨行。後樂先憂常小試，分門割戶任公評。
祇慙千里音塵隔，屢照忘疲讓鏡明。

家風原不廢鉏耰，負郭秋占覆隴雲。頓埽困倉空聚粒，
直教雞鶩總離羣。求珠但想逢淵客，種秫安能供麴君。
典到琴書無長物，小年徒喜得甘分。

三徑重開互緯經，疎櫺曲檻署新亭。閒來竹砌看鴿舞，
慣就花房趁蝶翎。行笈隨身勞跋涉，故園回首歎飄零。

卽今易主知誰氏屈指還終幾度星

雁行謀食各東西百斛舟膠尺水溪試手烹鮮踰負米
息心講學守分畦頻驚風樹銜深痛旋著麻衣別舊蹊
至竟不歸歸底處哀吟無壁可留題

曠代遭逢直虎門孤恩寧敢戀邱樊久嗤方朔常爭粟
頗傲相如僅著褌桃梗有時愁汜濫桂枝猶冀許攀援
蕭然退食超人外賓榻縱教鼠跡存

蓼蟲集蓼肯忘辛痛定當年涸轍鱗得路久霑書案雪
課功勤拂講筵塵寧知楊子談經宅聊著維摩問疾人
身逸心勞增悵望正同寶去玉州貧

詞源浩渺接湖江，吸水眞應勝老龐。
色壯風雲憑弱翰，吟成金石振虛窗。
飽諳食蜜中邊味，蚤辨登壇大小邦。
文格也同詩律細，可分芳潤養株椿。

莫訝經旬未適郊，病餘足痺怯趨朝。
差池漸隔鸛鴻侶，放曠何煩山澤招。
疾走祇成迷穴兔，殊音空作集林鴞。
無心出岫隨舒卷，豈有浮雲鎮在霄。

偶誦前人石硯歌，浮生應悟墨同磨。
三千字對承恩久，六十年過得算多。
鏡裏已看雙鬢禿，車邊可待八騶呵。
乞身幸遂脩然別，勿問山資約幾何。

出郊問皇四子疾，以春日園居用夏重集中東

宮召赴西園八首韻見示並邀同作依韻奉和
藉以獻規

積潤新銷土脈融，繞隄煙柳翠冥濛。
平臺此日誰分苑，少海當年自有宮。
但識臨淵常鑒水，未妨歸路獨吟風。
重來倍覺詩篇好，高格應增藥石中。

不煩設醴送氤氲，試辨槍旗穀雨分。
湯候沸時同養火，味留甘處似論文。
一甌便喜襟堪滌，七椀終嫌啜太勤。
卽事細推消息在，并將節度授夫君。

時以龍井茶奉餉

遙看隔座鏡屏光，含景分明別一堂。
插架儘堪閒竹素，細書詎肯廢鉛黃。
畫圖鈍置難常肖，監史駢羅信足方。

靜對已勝參止觀底須戒本設君芻

鐘漏催同按刻書蟬聯款語惜離居未編佳詠三千首
已度殘春九十餘氣盛且欣乘漲水年衰殊怯理荒畬
適從塘外芳原望稽事關心麥候初

朱門重隔苑西牆面勢全依水一方記得機舟迎客渡
共看臥柳比橋長儻無見賞空摧折那不隨時愛景光
亭館新成喬木少必逢佳植好扶將

皇子移居之始
有欹柳橫臥水面

見者盛賞其奇古未幾爲
風所折皇子有詩惜之

閒平雅望古無前名句賡酬日月懸縱有竹林誇得地
何如荆樹樂全天星文自列東西宿水脈寧殊大小川

見說春令頻響集不須苦憶紫瓊仙

承以果親王詩冊見示紫瓊主人

慎靖郡王別號也二王皆與

皇子

酬唱最洽時

諸皇子亦常出園問疾

年來自訝壯心降舊驛難忘堠隻雙敢望就閒山蚤買

只愁任重鼎同扛炊梁未到容推枕浮葉還疑見渡江

知我平生有神契夢中占夢向蕭窗

生前作有乞身詩皇子固未之見

而原倡云君夢思家

試渡江若合符契

連天草色渺無涯望遠徒驚鬢雪加常聽清音寄山水
轉教痼疾感煙霞勞形車馬紅塵客放跡江湖白鳥家
但欲逍遙同適性久知齊物領南華

用程旣培和三俊送別韻却寄

自昔長安居不易廿載領將暄冷意更從榜後送歸人
每到尊前煩制淚文壇立幟文風清部勒居然衛尉程
何事一錢都不直正緣醉客未知名臨歧珍重通門誼
新樣改來非宿契乘時得意自看花往事見嘲徒渴睡
白雲回望嶺頭時伯氏壻催仲氏簾但覺新歸良足慰
承歡不減錦衣隨關心見說椿萱老況復淵明脚疾蚤
既培尊人素患脚疾甚劇書來眠食總平安此事足包諸事好 翠

華南指風雲俱海底明月搜遺珠取材幸不棄葑菲挺
秀定合辭蒹葭祇笑苦吟同子美未肯借籌驚暮齒文
章千古有心知因人獻賦徒爲耳幽棲本絕車馬喧覓

句不妨常閉門新篇賡韻想同調別酒染襟看舊痕老
夫今年宛退院偶侵沴氣陰陽戰胸中冰炭倏交加籠
底參苓殆嘗遍講肆沈沈虛幌垂郊園寂寂落花飛三
春多病隨龍種百日偷閒隔虎闌病中閒趣閒消受
因病得閒病何有便尋初服或難焉暫息勞筋堪羨否
當時塌翼盼高翀此日飛毛怯順風懷土頗同邊塞馬
驚秋又報閏年桐魚牋未暇傳悵悵千里詩筒憑轉訪
倡酬只擬共戎談慰藉如憐跛子望却憶殘冬接數行
文房分得有真香輕煙製墨陳珪壁古錦裝書織鳳皇
去冬以書
墨見寄何以報君惟遠志培風好振垂天翅兒曹埽

徑喜攀邀我意論文久虛遲短幅難窮別後情寄聲還
與問賢兄謂令兄見紆孝廉應知棣萼方開豔終待珠槃爲主
盟

校書之暇見內子日核簿帳戲作示兒輩

老夫校書如算錢老婦算錢如校書老夫按字訂其誤
老婦按陌尋其虛燈前試聽夫語婦璫璫何必常紛拏
淵魚察見固不易水清還恐嗟無魚婦言此足調衆口
雀鼠耗盡將焉如從來制大先制小大不可制徒歛歔
正如書蠹怕滋長蚤趁風日勤驅除芸香幸可護編帙
鉛黃尙欲刊牋疏頗聞落葉在常埽詎有非種能忘鋤

偶然鉤考竟遺漏却似點勘時粗疎小有縱舍或無礙
君每追改勞長吁各懷一癖顧相笑毋乃以田而廢漁
我聞不覺爲領首寧以婦言都忽諸與卿各自有日課
錢囊書篋宜兼儲儒者治生信急務古也有志非欺子
漏卮謹塞裕本分豁壑自免求贏餘坤爲吝嗇義何取
閉藏實助陽和舒援毫潤色示子婦家風勤儉期如初
更因作法戒流弊莫耽錢譜荒經畬

輓受茲前輩奉和 皇五子韻

承訃誰能不慘容心摧更在講筵同東南使節行偏慣
江海通津數乍窮適去適來疑夢幻斯人斯厄問昭融

夔龍禮樂淵雲筆親炙仍教歎古風

門地文章兩擅聲掄才幾度憶持衡衣纔欲典勞搜篋
經足常傳勝滿羸天外鴻儀徒縹緲庭前犀角漸崢嶸
獨憐握手燒燈節永訣難將別恨平

林園長戀北堂春泉路應知淚濕巾清白自堪安壽母
恩榮咸仰恤勞臣生前節概惟敦本身後交游倍識真
一語儻容參史氏髯翁高步邁常倫

脩門歸旆望翩翩元圃陪游絕撫肩玉枕帖邊餘退筆
在直日連歲招飲海棠花底少鋪氈海棠書屋同心尙欲傾家釀

別業還宜作墓田眇眇愁懷聞浩倡天人揆藻正星

連

諸位

皇子多有繼作者

有堂同年仍用三松韻見投依韻寄答

少年意氣日在東
杖鄉杖國如秋冬
君老於我健於我
文旌電掣環堯封
畿南引領每遙望
雲峯障面何龍從
雙情交映蚤相慰
報章疊韻仍三松
波濤入筆鼓豪興
想見白髯添紫茸
羨君長按舊調管
愧我却似吹殘蔥
首春伏枕遂連月
送藥那得來仙童
沈縣自分委陰壑
匍匐徐起穿天墉
講筵重到久塵積
逐隊五年無此風
藏鱗敢爲避行雨
割耳正恐加乖龍
隱憂耿耿尙有說
北渚眇眇難追蹤
摘詞詎足擬七發
義取披豁將毋同

皇四子奏准西花園

養疾性應教和詩頗多迎

鑾纔過便拂席檻外已見

榴花紅鮐生面目幸無改同人領袖愁偏窮

介少宗伯歿於臺莊

成虧信手聽昭氏哀王響絕金聲縱瀛洲狎主識淵海

觀少司馬改少宰兼掌翰林院事

樂泉膏醴美所鍾卽今汲飲記疏鑿

待與去思齊斲龔

君寄倪少僕詩申勒石樂泉之約

初冬報政暫還闕

來往體參張弛弓爾時契闊藉傾吐庶少宿物常填胸
詩以先之寫難了差勝不鳴嗞啞鐘

閏端午感懷

六旬重轉午四度閏端陽

牲以壬午生自癸巳壬子辛未至今年壬午皆閏五月

蚤歲逢斯節先人示幾章

癸巳閏端午先大夫有七絕十首

興惟尋競

渡力未辦稱觴符札同虔錄丹砂共祕藏半生憑屢值

此日頓相忘講幄拈題切賡吟應教忙

皇四子見邀同作無心

誇奪錦有淚勝浮湘角黍空頻薦宮衣淡舊香却思童

卯樂聊紀歲華長兩接龍山會

丁巳丙子皆遇閏重陽

三聯鵲駕

行庚寅己酉戊辰皆遇閏七月

試參來復理應戀再中光慧業傳家

集居然續命方

輓池州守王式堂

度表兄

兩家先祖妣同室女兄弟

君祖母聞人太君先祖母胞姊也

君齒爲我

兄我婚君從妹

亡室王夫人君伯父思敏公次女

亡妻有遺女又適君

長嗣

長女歸君長男誥

密戚擬潘楊信有自來矣我幸廁鄉舉

君方困諸生一朝逢曠典薦牘連茹登關中首捧檄

賜金資驛程家兄且却步吾益慚先鳴

雍正己酉君與先大兄同以保

舉引

見君奉發陝西以知縣用仍

賞路費

報最自

百兩先兄發往湖廣以知縣以下等官試用

陞雷州

中間曾入覲我適滯京闕未

西陲分符向南粵

同知

肯羨登仙還承憫遭別重之以婚姻戚誼貫存歿

乾隆丁巳

下第與君重晤京邸始訂兒女婚姻之約時君妹歿十一年矣

君爲老通守我作新郎

君求珠臨漲海海道雷瓊分相思不相見稚子通殷勤

余壬戌登第後甲子卽典試廣東君在雷州惟幼子號留省榻後時得見之

迨君以憂去我

久淪緇塵服闋到青門握手語難吐方寸雜悲歡說起

從何處兒女蚤還鄉

結來京就婚已挈眷歸矣

兩翁轉萍聚劒外奉

新除

補敘永
廳同知

又送天涯去君兒須侍父我女須從夫瞿

塘驚魄動棧道愁腸紆既添骨肉愛還怕鱗鴻疎平安
時見慰雅懷尋遂初五馬果遄征一麾殊懶把衰病暗
相侵榮名識虛假我從浮宦海筏喻慨難捨承聞買山
興笑口代爲哆只疑高尙語人人解云云誰能趁風利
卸帆辭要津贊成聊復爾寧保無逡巡急流誠勇退便
是神仙人方面重循良池陽領名郡山水足清娛彌欣
去家近岷江建瓴下輕舸到官順掉頭竟不顧如守尾
生信我時遙頰首進退真從容身名乃俱泰不愧爲我
兄

叶

西湖富煙景暢游輸此翁何當成一老杖履還追

從聞君返舊鄉頗少譙游樂服官閱三紀老鶴迷城郭
幸有先人廬徑荒煩剗削松楸故無恙能免補凋落難
求好田宅徒對窮親知緩急諒時有憂喜常同之頓緣
經理切坐覺形神疲本意覓閒趣却教催病期吾壻屢
馳書備詳君患苦知君被纏縛正以心勞故誰傳安心
法浪作參禪語我計出無聊君聽如有悟書來重致謝
似令魔障捐更聞醫者賀脈候殊勝前吾家盡稱慶況
承膝下歡如何急足至遽驚凶問傳君於倫紀間俯仰
喜皆足至於生死際來去見已確治命豫平時瀕危同
睡熟人生幸如此怛化不須哭顧我憶疇昔劇於飛電

光少年共娛戲飲博嗜顛狂中年各游宦利名牽鎖韁

晚年永離別阻絕嗟參商湖山北邙便世世藉埋骨緇

逐繫匏分還憑首邱接芝陽與龍泓先靈久安宅

先壟在青

芝陽君祖墓在龍井

九京偕奉杖魂氣定不隔儻容旋解組故里

延殘年尋君已凋喪顧影徒潸然潸然感他日此日寧

忍言余懷尙悽惻更堪苦凶間訓子待成名秋闈俄罷

試

詰以副貢將應鄉試

隨牒遠游秦將飛又遭掣

統赴陝候補縣丞

遺恨

兩男兒皆君意中事泡影契真空或應都撥棄君欲通

我夢難越關山岑我欲酌君酒難撫靈牀琴作詩寄吾

壻代我吞聲吟我女粗識字懸知淚潸潸

山半墜馬幸而不傷詩以志險

爲避需泥阻言尋度嶺蹊延緣隨磨蟻掣曳擬連雞斗
上山腰細難留馬足齊隕空驚脫轡迸遠免遭踉蹌轉
因風迅九流逐坂低平生飽顛躓此險倍淒迷蹉跌殊
無恙馳驅未可稽重教理銜策別與寬攀躋金戟誰誇
拓氈衫幸蚤攜應勝杜賓客爭似鄧征西

游雙塔峯作

曾聞雙塔峯長歌擅初白誰能復抗手欲語祇辭舌今
來已三過攬勝試親陟西峯頗擁腫柱礎蓮臺密東峯
稍戍削蝨賊禾根蝕其顛似切倚其踵乃離立谿衍巖

洞開風隧凜毛髮應知漸崩豁原始本一物西偏裂未
透面背異凹凸若遺劃三分強弱殆均敵石質更殊常
墳壚雜砂礫橫紋掩縱理膚寸辨層疊只疑古戍堡摧
剝尠瓴甃頽基剩塹阜兩角冠山列於山久通氣蒸潤
轉融結遠映借天光亦含蒼翠色雲根出其下時復助
滃鬱特緣依托高真贗遂難別盛名求克副殊愧文人
筆錘峯較奇峭正可准一律此論董公傳非余私揣測
總憲董東山前輩見語曾至磬
鍾峯下諦觀疑是塔心之類
挾唐突到山靈斯游增日業

九月十一日榜發示三俊

昨晚校對先資政詩稿
適見九月十一日候榜

志慨二絕時歲在丁酉大兄久困場屋性尚應童子試也今三俊已兩試京兆報罷三吾亦下

第三科矣

稚兒預文戰得失朝來拌先公有遺集校對宵分完疆
園什噩歲舊識明明看九月十一日候榜吟辛酸我今
適相值前期示艱難吾兄實吾師煙霄阻飛翰維余過
叨忝於汝寧摧殘不須憂失馬仍自尋還丹父書誠克
守祖澤宜未殫汝伯已賁志而兄常慙歡邁征期并力
定省行加餐童心勿瑀碌往事堪汎瀾

句山以病起作秋色詩見示依韻一首

嚴霜摧百卉猛捷逞白打焚如崑岡玉全勝雀臺瓦秋

色擅東籬雞冠慚首下其他炫紅紫鼎裂走嬰妬年少
曾幾時老物此息也菊花雞冠老少年皆原倡所標舉者起病藉題詩詩
來酒方把興高忘韻險踴躍愧金冶明發映朝暉莫訝
面餘赭

疊前韻柬句山索魚鮓

昔我寄居時池魚不勝打恨無斫鱸手盤飣擬覆入瓦
良庖今可借已歎網空下市粥匪園蔬愁傷數錢妬盍
歸而謀諸道遠祇惶也鄰牆堪貰酒援例筆重把有報
行有施往復契元治儻以盡歡嫌從騎汗還赭

皇六子得作鮓法卽以見餉再疊前韻奉謝并邀

句山同作

騷壇苦連兵兵弱何足打致膳還致師進退想卜瓦新
鮮勝龍肝得應茅積下白小珠顆繁紅鮮女顏妍醒酒
獻方乎割烹滋愧也解嘲體楊作聯句筆劉把共誇斫
鱸巧飛鏐擬歐冶誰實倡前行正須推渥赭

句山連報二章三疊前韻奉答

鼓從再三竭圍請更一打閉關闖然出氣振武安瓦雄
豪兼妙麗劒器舞庭下散花天示現醜婦笑矜姁獨恨
金盤空鱸殘其識也興緣秋色感碎金尙盈把靜中嫌
強聒鳥語辨公治若遣積柴供小山嗟已赭

句山再示和章戒勿復作晚來適得魚鮓欲以奉

餉值已入城四疊前韻寄正

解讎奉詩盟勿誇賀拔打洪鐘已停叩萬籟靜霜瓦只
恐食無魚占星從畱下庭柯晚鴉集弄舌兒語妖饌品
得家珍器發駭龍也引箸擬分嘗開樽還對把寧知車
擊轂已似鐵飛冶借此息波瀾潮平鑿龕赭

前作業與句山講解未諒鄙意將有責言五疊前
韻激之

險韻戒頻拈復聞銅鉢打疊胸餘蒂芥定水苦投瓦詎
敢敵淹中無緣罷鼓下里曲限巴人新歌換虞姪技癢

誠有之響答其宜也莫因蒲懶拔漫說不成把賈勇試
浮深鶴躍惟古治報章還備豫竈土足充赭

句山果復示一章殆以僕爲不可信也六疊前韻

申固其約

秋氣驗鐘鳴危機讖鉞打未足比虛舟誰能忘

去飄瓦

慣驚山嶽銳定逐江河下瑜亮終喪雄尹邢勿爭姁餐
英知落矣思鱸擬行也適興偶謠吟何須筆勤把惟應
謝烹鍊永閉舊坑冶詩債兩蠲除快若脫鉗赭

旣與句山申約而詩筒復突如其來將以空言無

施欲要僕謝之以實乎七疊前韻姑以餌之

虬欲負熊游鳳偏怯鴉打盟書停敵血誑語等飛瓦爲

嫌六出阻終在七擒下吟苦願兒慚嫁畢忘女妖

昨日僕方

嫁女不鼓輒攻之棄言非信也巾原隨意脫袖莫有心把

城府釋猜防壺觴足陶冶更烹淡墨鱗共賞御袍赭

菊名

句山復以詩來託詞戒殺用意殊厚顧謂以此亂

之則非真欲寢兵也八疊前韻更作挑戰語以

試其誠否

甌嗤學士過鐘警道人打直散逐奔雲體疲愁解瓦詩
債晚還追攻策猛逾下幸許罷金樅勝教調玉姪多方
以誤之不信其尤也未甘秋容淡空戒釣竿把息射更

張機鼓橐肯停泊漢過有時先羌面詎嫌赭

句山竟以不戰屈人僕亦廢然自阻靜翫小冊愧
荷 皇子辱題而同人亦不我棄也懷不能已
九疊前韻以識其末

潮音喧復寂爲向空城打幸借一九泥免碎兩鴛瓦
帝子笑雲中聲高曲殊下霓裳天樂飄姑射仙姿妬羣
真迭相和雲閣吏書也袖沾翰墨香手勝芙蓉把點鐵
仰金丹何容議黃治小冊闇堪探虹光赫如赭

句山復密構三章益潛以重兵躡吾後也十疊前
韻解之

曾聞鼓子花無聲憑雨打豈有決雄雌不須辨璋瓦閉

門思轉苦驚坐客皆下樣傳京兆嫵數缺河間妃

君作終滅

僕一首

氣盛肯弱焉紙盡徒爲也龍化尾旋燒獫飲臂迭

把各戀宋人株誰熄安公治藥毒更潛侵應借神鞭赭

題金圃聽鐘山房圖仍用前韻

警夜借鯨鏗寢酣嫌早打遷轉就高枝委去等遺瓦

方君

移居內城

迴顧舊巢痕將飛勢還下教兒幸離癡送女尙憐

妃此境少圖傳寧能忽然也嗟我漫萍浮卜居難算把

留爪儻尋鴻鑄鐘方倩冶却想殷牀餘朝霞旋染赭

承 皇六子於倡和詩冊補圖二版仍用前韻賦

謝

詩中應有畫畫稿倩誰打 天人欣點筆金注許博瓦

皇子先索書
曼韻詩一冊

故知北渚情宛契東籬下秋漁挈生鮮

秋色染嬌妩合璧更何人斂衽獨維也徵吟盈楮冊求
益慚菜把生面一時開鑊千分兩冶丹青兼墨妙從此
禁塗赭

和句山寒夜漏盡上直途中作

已知枯寂似禪僧行脚因緣脫未能夢幻儘教驚馬秣

用山谷馬齧
枯其二句意

宵寒偏合與雞興

內經蚤臥蚤
起與雞俱興

翻來綰帶

三條陌映徹靈臺一片冰舊雨頗慚疎硯席卽今同趁

讀書燈

縉華典滇試歸小飲話舊仍用前韻四首

君歸初待漏同聽統如打出入宛相避屢見月移瓦那

無雞黍設好趁牛羊下

用楊素答侯白語

鄰牆催晚食兒語羨

增妖懷土肯忘諸寧親其急也

生卽擬請假

流行坎則止有

酒且勤把松柏耐寒深桃李迎春冶老馬謝長途他年

期賦赭

姑孰昔同游橫江槩頻打鎖院事方殷積卷勝累瓦蒐

羅藉沙汰風箏舞空下西子憫蒙汚無鹽笑矜妬捉刀

信奇哉載筆可知也程文辱相質飲次帙重把故知揀

金手便是鑄人冶清鑒喜如冰衰顏免添赭

滇南四時春木葉馘頭打寶礦擅煎砂叢祠或銅瓦迴
坡語相接十里隔高下夷面自睢盱蠻歌儘妖妖我身
曾未到膝下蚤聞也君行萬里道筆想紀程把印月契
淵源傳家證弓冶潤色勝丹青不須重買赭

駢驥讓鴛鴦先鴛鴦驚鴨打士方不遇時凜若垂檐瓦生
第時居鄉爲未墨吏所窘火色幸騰上水德惟善下得路莫爭馳入

官常妒妖窮通驗時平閱歷想深也由來選梁棟培護
自拱把詎比不祥金妄語駭良冶省躬亦滋愧酒罷頰
還赭

大銀臺孫虛船

顯

先生以詩問作鮓法既錄以奉

報復餉鮓一器詩以侑之仍用前韻

昨夢繞明湖軟浪船頭打酒家尋五柳

作鮓法傳自五柳居

水榭

換新瓦斫鱸喜魚鮮杯深箸方下鄰牆雞喚醒寢語婢
含妬清篇適垂訊方法舊傳也畫餅愧空談餉鮓器重
把應笑詒癡符慣守鑄錯冶故里儻陪游臺映初陽赭
承 皇四子以十八疊打字韻詩卷見贈仍用前

韻呈謝

詩思捷禪機四面旋風打

用普化和尚語

譬彼陶家輪模出百

千瓦幻境必窮探神山窺水下鍛成老吏手笑煞女郎

妖數參十八變武事其粗也

皇子以自打爲武藝第
十八故疊韻必滿此數性

亦如數
效顰

紙揭藏經背總錄卷親把報章謝投贈交易倣

農冶誰言匪佳識一任歎天赭

虛船先生復示報章仍用前韻奉答

悲筵已終拍

前韻已
十八疊

殘劫又催打擬隨蒼鼠竄捧首隱

苔瓦控地想搏風智出蝸鳩下沈吟送宵柝娥月影憐
妖有亂亦有重例起楚辭也敢嫌用心苦瘦骨尙餘把
抵玉羨盈山碎金願歸冶正因魚眼紅只見驥沫赭

皇四子見

姓

和虛船先生詩復示一首頗訝渝約

再呈謝過並以解嘲

韻海任探奇未容一網打豈意厭蛙喧朱篆擬投瓦不
讓出頭地誰屑寄籬下愧將縮蛇拙久壓插花妖一飯
引年先再三誠瀆也却思絮語歇隔座手應把詞源禁
旁滲可怕陽冰治凍芋自藏萌童山勿煩緒

重答 皇四子

吟壇聞報罷毘毘不須打顧慚都堂松乾死負屋瓦對
局必爭先那能無意下硯煖細冰融毫枯夢花妖此舉
豈無名敵加斯應也仙才信超詣右拍更左把故知神
鼎出寧藉昆吾冶鑪捶儻重誇腴顏敷粉緒

見三俊與汪聳雲倬

日章

立春倡和作復示一首

不識迴颿擣浪說鼓能打年少解窺人縫辨參差瓦玉
本勝冰清駒寧久轅下努力學書成鍾門傳姪妣詩盟
肯忘諸父戰佇捷也應節薦辛盤屠蘇趁先把雷密水
穿巖礪勁風生冶勿效我蹉跎悴容難復赭

歲暮少事料檢詩稿打字韻僅二十三首更吟一
章足之

光陰催轉轂塵尾攀車打影看添一線屋擬欠三瓦歲
事驗將終東皇符已下舊債且從蠲新衣頗矜姪隨俗
亦宜之偷閒彌適也編年託詩稿疊韻哂遺把二十四
番全方稱陽春冶却願消寒圖染白髮成赭

靜廉齋詩集卷八終

靜廉齋詩集卷九

仁和金 甦雨叔

正月初六日 重華官侍宴聯句恭和

御製重華官茶宴內廷翰林等卽事書懷並令賡韻元

韻 癸未

璫筵珠絡影交加曲宴疏 恩賞歲華視發龍香凝劑
墨甌分鳳餅試團茶彤庭映日金鋪麗仙樂凌風羽蓋
斜春氣正憑 天藻運也教凍芋彊抽芽

恭和

御製紫光閣錫宴外藩並各回部卽席得句元韻

禁籞瓊枝拂幕低
諸藩侍宴拜
恩齊和風香送筵前
爵瑞靄光瞻閣上
藜慶協春融韶奏律
樂徵德廣譯通
鞞東漸湛露謳歌久
王會增圖月嶠西

侍宴聯句和詩紀
恩二首敬用

御製元韻

玉塞恢疆幾倍加
舞干柔遠邁重華
說經分隔仙瀛會
賡韻
恩叨曲宴茶結得
荷囊聲采麗捧將
蕉硯墨痕
斜枯毫敢望花生
夢春澤欣沾詩始
芽

朶殿東開列座低
廣場闌檻望偏齊
牋分側理苔成紙
珮響衝牙玉號藜
縹緲
天歌傳寶翰逡巡
里曲擬銅

韞游仙共覺清都迴只在中垣紫極西

重華宮在乾清宮之西

是日

上自紫光閣還重華宮召南書房尚書房

諸臣傳

恆來保劉統勳梁詩正陳惠華劉綸董邦

達彭啓

豐觀保于敏中張泰開王際華錢汝誠寶

光釐王會汾

福未金姓倪承寬蔣棟邊繼祖盧文

昭等二十人

恩賜茶宴命同賦歲朝圖聯句七

言排律

韻畢續發御製七律二首命卽席

和進其

分用之硯卽拜賜捧出仍加賞畫卷小荷

包各有

差臣姓得金星歛石蕉林硯一方小荷包

謹記

去臘聞

皇八子有消寒十疊敲字韻詩分贈同

人索和昨承以一首見示依韻奉呈

苦吟思轉拙手勢笑推敲

姓昨歲爲打

字疊韻所窘

宵倦睫交寧知藏蚓竅終欲探蟪巢泳沼冰方泮垂綸

餌旋拋酒催前夕
璣花覓舊叢梢
鸞鳳鞭難避麒麟
檀任嘲
蔡吹騰象緯杯
膠愧堂坳莫訝空
螯嚼窮元似孟郊

感舊贈表姪柴右林

麟生

場宰

乃祖吾翁惟友壻
居同里閨文爲戲
我忝超君輩行先

儻從君齒宜稱弟
杖履時過書畫船

令祖錦川公齋名

童冠共

游香積寺

寺在湖墅去君家最近

皋亭競渡詠俳諧
綠梅隱語含

標致二老風流足
倡酬我猶領略君
應記自飽嚴陵苜

蓴餐

錦川公任淳安學博

便虛湖墅雞豚會
聚散名場奔走艱
死

生遠道音書滯廿年
重見在京華風樹餘悲總
銜涕

壬戌

與右林同試禮闈時
兩家先人皆棄世
雕蟲薄技愧先鳴
府海長才嗟小

試頗聞鹽筴易贏餘
爲貧而仕良堪慰
宦途終歎險巇
多吏議無端屈伸異
不因鏡暗喜新磨
那得萍浮適相

值首春酬應任疏懶
先集編排分次第
愁看哭奠錦川

題先資政有哭
錦川公詩
款門何幸逢君至
詩述家風我未能賦

傳祖德君須製樂往哀來并一時撫
今追昔縣三世出
郊暫駕短轅歸隔巷
閒招斗酒貰燈前
鬢影鬬霜華何
術駐顏聊取醉

縉華以素冊索書小飲話舊四首更成六疊聊盡

送別之語

何郎真得意鼓待發船打家迎扶桑日景射玉堂瓦爇
馭正遲遲寧逐訾黃下遠道久忘勞芳叢試窺奸儻令
交臂失萬里空行也生漢南及門多未投謁者姑留待之師門謁先入土
物贅虔把却笑剖新鋤不嫌投舊冶三五羨當年阿婆
慚抹赭

神仙經小劫霹靂繞空打造物本無心秋穉每盈瓦惟
應審趨避詎可校高下懶髓不煩醫玉顏自增妍況乃
望雲情低徊十年也所幸紫泥封使節竟同把誰言鍾
山玉必待試爐冶暫作善刀藏徐拭華陰赭

惱爺有添丁莫訝玉川打問年須授室璋固願從瓦君

憐同弱弟提挈許南下

將以三俊附舟歸里就姻

故鄉似他鄉未識

西子姪縱壑已憂之觸藩滋悔也常教口瓶守勿遣酒
卮把笑我懶攻駒累君防躍治苦語託孤然童駮面應
赭

人生迭聚散袞袞毬場打王郎君宿契注乃判鉤瓦此
去過其家懸榻定爲下未驚鬚鬢改應喜兒女姪豚犬
沉攜將見姊如歸也維余尙匏繫南望淚盈把頗愁義
莊缺難比卽山冶相與築籬籬莫教萌蘖赭

何蕃昔憶歸大杖擬遙打

生昔下第思歸以書稟命尊公不許

今來娛晝

錦喜氣浮檐瓦上堂起居畢顧看繞堂下青衿引佳兒

新婦報遺妣

生有子已入泮昨歲新娶

從姑初見舅重慶乃全也賀

錢知蚤釀壽酒請迭把寒士解鬱紆少年警游冶致語

進優伶雜然敷粉赭

唾壺解含垢如意無端打雷鳴欺啞鐘本質乃陶瓦夜

郎休自大

前州牧諄生語也

曾記辱階下歸來瀛洲客絕勝藐

姑妣豪氣未除乎人言可畏也銷聲效寒蟬痴儂忘竿

把干將幸藏鋒模範想歐冶青雲穩致身滄海日初赭

雜感四首仍疊打字韻

師利證圓通尙與普賢打侍講有文鸞聲振魏宮瓦盛
氣涌如山誰能抑教下歎息砌傍兒迸逸鼎中妣不學

乃無術調護奚堪也東薪徒束濕課穫未滿把神劒鑄
難成時至始銷冶陰火笑空燃青燐幾曾赭

青山送白雨羯鼓繁聲打泰交陳俗樂詭遇等合瓦豈
意廣平賢幾出汝陽下曾記畏卿嗔嫵媚更憐姁水乳
足閒情莊語無嫌也必爲東野御鞭苦轡牢把不堪長
束縛轉慕逐游冶遠復警迷塗好趁殘陽赭

鶯兒語惺惺有時亦遭打頗憶高臺傾彌貴得全瓦螻
蛤暫虧盈轆轤番上下蛾眉被謠詠蕉萃敢矜姁靚飾
發光明殊勝畫圖也故知荆山璞猶是刑餘把丹成需
九轉屏息守爐冶寶氣吐虹霓還看映巖赭

浮生憑幹運宛轉秋千打安知井底泥不作簷端瓦妙
應悟環中鈍根死句下鶯子大雄徒幻形天女姪或談
人我相答語祇不也撒手自超然懸厓勿煩把雷公行
擊橐靜待化工治朱碧且隨看顏甲久忘赭

顧密齋同年將歸成都自錄題有堂樂全圖序留
贈旭莊旭莊作序以送往復前文纏綿於哀樂
之際讀之殆難爲懷附跋一章卽以志別

樂全有全圖極寫田居樂我意亦云然祇惜空言託有
時真樂遂振策出京洛顧看相送人轉覺情懷惡故知
哀樂趣隨境循環作感物湊天機何暇容商度或耽泉

石興韁鎖幸擺落或牽兒女腸膠漆戀粘著淺深信殊
量偏執乃相若交朋慨分張別緒引煩錯無聊同歎逝
苦語黯蕭索有意效噓枯熱中滋嚌噉半分笑啼面雜
進溫涼藥客氣良有之淳意則已薄從此認端倪正須
忘適莫通人矜筆妙脫手捷九躍宛轉義關生清言互
酬酢未辨理誰在特喜思不涸兩家通騎驛於我實心
忤孔顏阻門牆莊老賸糟粕講學喙羞長談禪影嗤掠
性情見真際詎敢妄測酌徵實勝翻空臨歧得其略爲
若雁離羣爲若魚縱壑生能自然呈畫史省般礴

皇四子以七律四章垂念近狀并及南中家事依

韻陳謝

好句供人十日思詩筒響答尙言遲

原作云翻爲情深得句遲

恰逢

雁足傳書候如聽鶯聲繞筆時精鍊正須封寶鼎直繩
猶欲引朱絲祇愁白雪頻邀和囊底輸他缺齒垂

裁從西柄認招搖爽氣金天漸沈寥膏火不嫌親短檠
書田長爲養靈苗催人頓覺吟蟲急假日寧將看弈消
近作有觀弈
絡緯二首彈指三秋候飛蓋又麾小隊度紅橋

樂趣元從靜處生閒門盡日少將迎符書牆角懸蘿影
絮語檐牙鬬雀聲詩屢幾篇聊趁韻史繙終卷已忘名
午餘肯作炊梁夢蝴蝶莊周與證明

珍重吟箋擘海苔清音殊勝玉彈哀情深每荷從容問
書報何妨瑣屑開南北相望三月隔鱗鴻得伴一時來
原作云辛苦老年婚嫁累平安消息定分明因風併述平安狀歡喜應知自
有臺

齒痛戲作

六十齒方痛得痛爲已遲正緣痛未慣一痛不可支致
病必有因無聊聊引咎大肉硬餅陳肯遺餘力否齒或
不堪勞借茲懲老饕老饕失奉養齒愈難堅牢不堅斯
落矣落卽痛應止欲落不落間操縱乃惟齒齒豁殊可
憐齒盡天年全絕勝利齒兒含齒歸黃泉但祝痛勿急

歲痛歲落一不違昌黎約吾壽踰九十

翫几上水盆因示兒輩

錢刀積苔翠石蟹帶砂紫厥性特清涼明目有妙理不
須製膏散但取浸盆水凌晨常注視蘸指更勤洗離炎
隨坎下翳障潛消弭貯以素資盆供在烏皮几明光開
白地三采織成綺羣兒爭指點圍繞足不徒錢如榆莢
散疊疊階前委刀作雁翎排森森壁後倚郭索奮雙螯
爬沙宛中吐勢利助威嚴顧盼足歡喜老夫默位置兒
語湊微旨不見橫行者逐貨無時已回頭兵在頸却恨
目空昧徒供冷眼看流泉終逝矣念茲心骨寒業火何

從起應知治目法還自治心始

題靜廉齋壁

新涼不藉北窗風斗室脩然寄此翁
滲漏酒腸從暴下針砭詩病欲通中
誤書閭解情元適禿筆藏鋒體亦工
却恐養成閒懶性警心時聽塞門鴻

次湯葯岡

大紳

同年留別韻卽送南歸

笛孔誰教備易京急吹只擬送人行
霑衣正屆新霜候摻袂難勝舊雨情
座上客憑通耳語圖中樣肯銜眉名
還從怨別窺高致方寸無畦自可耕

宦海帆張慣逗遛怪來客思總如秋
支撐頗欲成錨脚

鋒穎安能效筆頭觴詠寫心憐久闊山川回首歎相繆
浮生幾度供離合君自無愁我代愁

西風蕭瑟促裝緜脫帽羣輸性所便

葯岡體壯秋冬常脫帽

放眼

却逢山色淨歸心須逐水紋旋不堪懷遠聊斟酒莫負
登高更擘箋蝴蝶莊周隨幻化且留佳句夢游仙

人境隨緣儘結廬立錫何意并錫無千金點竄誰懸購
五木迴旋未聽呼奉杖適諧游子意

長君傳業侍行

泛舟還稱

列仙懼酒錢請續離觴舉遠道青帘次第沽

題內子理琴圖

老來操作彌勝昔得按金徽歲幾番自覺手生聊袖手

每將譜意意中傳

我生蚤負彈琴興一曲還期范履霜老懶竟難傳指法
不如聽取自徜徉

君年六十我過二牧犢當年形影單雅曲選來雙鳳好
雉朝飛操不須彈

絲桐練響信堪怡竹素游心亦有時却笑畫師忘位置
圖書委地總非宜

和鴻臚傅謹齋

爲許

前輩移居四首

古歡縹緲挹餘香

所居實山薑先生舊宅

賀厦偏宜引索郎未傍

綺筵相煖熱且吟白雪暫清涼撚髭何足酬高韻閣筆

還愁送罰觴歎息詩禪真得髓舉頭天外有鸞凰

萬卷居然擁百城書巢自喜燕新成

原序云入都如新燕營巢

飄來

絲管空中賞悟徹槐柯夢裏榮封殖總留前輩意蓬壺

元借列仙名

原序云庭下有槐北鄰爲方壺齋梨園也

滿庭風月誰分破羸

得清卿分外清

門前廣陌宛長隄拄笏看山恰向西識路更調歸棧馬

解談仍祝覓棲雞幸從逆旅謀安宅好換新符壓舊題

鄰曲徵吟妨蝶夢拈毫頻見玉繩低

萍蹤占兆旅之於卽次年來偶定居

余亦遷居未久

卜築未聞

堪傲我贈言常擬孰華余寧知海氣工成市翻就山人

苦索魚頰首滇南風雅盛歌傳合組竟誰如

除夕閱劔南詩有六十二翁吟效顰二首

二十三史勘將徧

昨點明史訖惟舊唐書未校

六十二翁吟旋成儻

非退直俗緣少那得掩關清興生昔攜席帽困奔走老

竊囊粟忘經營紙窗燈火足佳趣辭年袞袞聞車聲

去秋已開七秩始往事聊作三分編賢書謬從弱冠錄

高第適當強仕年回頭廿載又水逝屈指百歲如風旋

劔南學步有餘愧前此蚤傳詩萬篇

句山見餉魚鮓報以糟蚶

甲申

佳鱠點金齋獮殼緘瓦壘兩饗臭味合一器往來捧近

憐竿罷釣

園池魚絕少

遠慕田留種短詠勸加斟鄉心酒邊

重

句山得蚶甚愜依韻見酬仍以隸事寂寥戒勿往
復僕亦窘於搜索但欲重投所嗜姑張空券以
挑之

食單紛左右顧盼比登壘熊魚隨取舍何惜手仍捧小
鮮辭縷切互物詫遺種白戰亦無嫌議饌方引重

句山遽報二章仍嫌所致太少諷以戒殺是宜謝
過并藉解嘲

混沌豈忘機渠眉自分壘乍疑藻思竭還喜魚牋捧珠

胎含秘寶蠡測愧癡種向使斂吾狂何緣得君重
閉蛤漚殘汁穴螳守遺壟浣手尙膏腥顧云不足捧糟
邱憑遠訪魁陸致奇種殺戒儻仍開口業恐滋重

春夏園居頗多佳趣卽事寄興

卷地東風密樹遮朝暎欲上氣蒸霞短衣苑戶眞瀟灑
獨向山坳埽落花

冰融鳬雁拍浮多惱得潛魚遠撇波靜泛自含尊重意
凌雲高格見天鵝

紅衣翠蓋繞亭臺好景當年及見來惆悵曲池今寂寞
門前重覓藕芽栽

新蒲刺水似秧針軟翠茸茸雨後深積翠蟠根掩荒沼
西湖正被葑田侵

便了閒來覓佐餐消磨長晝得魚難主人正羨卿曹樂
何日蘇隄把釣竿

連平何烈婦

錦環

輓詩

同年保定令廷楠孫婦也

夫死盜犯鋒刃夫幸全侍疾疾夫竟死兮義當殉若遣
兩姑聞得死乃其僅蓋棺事則已蹶起觸棺血如鸞大
翁俛念立孤心九泉共待生男信

周立崖

於禮

侍御招飲觀坡公清虛堂詩墨跡卽

用原韻跋後

古蹟零落如搏沙，賸有碑石空排衙。
清虛墨寶宛然在，醉眼凌紙元無花。
規撫不襲二王法，縱橫本擅三蘇家。
詩文書畫總一理，俊鵲獨擊殲羣鴉。
傳疑頗覺異今本，序與詩各有數字與今本異。
詩中爬韻二句在，搃韻之後殆初稿也。
探叢應喜逢新葩，諦觀絕叫頓起舞。
蟾蜍勢欲青冥爬，醇醪況從公瑾飲。
風味遠勝盧仝茶，齋中清韻愛響掇。
時勒石初畢門外熱客憑添搗，他日滇南望光氣。
立崖巒峨縣人碧雞金馬同咨嗟，詩成酒醒有故事，已見催月烘殘霞。

過市南小築感懷汪寶符柬范北臺

廷楨

索和

高梧散清陰，叢竹勢爭上。
庭前十笏地，薄靄掩碧帳。
當

年尋市隱於此寄疎放揮塵縱英談酌螺試佳釀燭跋
鎮流連牋分迭酬倡浮生嘅駒隙著展能幾兩圖成報
秋信詩識故非妄寶符於己巳作報秋圖辛未下世卉木日欣榮人琴
轉悽愴舊雨幸留君嗣音諧夙望懷遠共長吟庶幾春
有相

三吾於齋前種竹障以豆籬殊有幽致詩以賞之
高垣斗立圍深窪壁砌經春無草芽齋前索莫少生趣
含毫那得催心花吾兒解事試點綴當窗翦荻編新笆
纖纖豆蔓引徐上紫白鬪豔紛交加東偏更種一聚竹
恰逢多雨行鞭賒清音嘯風學鸞鳳亂影迎日迴龍蛇

入林把臂羨沈飲倚棚閒話思山家山林景物有如此
幾時父子相隨耶

敬堂以善緣庵僧澄徹所刻空印老人

鎮澄

金剛

經修釋見貽賦謝一首

我持金剛經其傳已三世亦如讀父書并思先所嗜寧
貪福田種庶免善根昧在公理官課退直庀家事息心
只車中默誦久不置誦久如有得小復著思議說是便
成非卽非乃名是一語寓三身過去現在未心依戒珠
定路逐轉輪逝瀉水屢終卷證果到初地

每在城入直誦不滿三卷

出園則幾及七卷

枯禪被禪縛輸我慣遊戲注滿八百家

見空印序

塞破三千界空印一燈燃善緣諸佛記竹林精舍開前
劫想夾侍蓋頭茅把共題隨驗宿契竹園精舍佛說法
道場也余向以顏
書室而空印序亦云
書於臺山竹林精舍荷君通津梁盥手呈小偈

晚香玉八首

碧樹裁抽照席枝搔頭綴玉短偏宜花寒老圃難留伴
日暮佳人自有期石畔睡香同逸品庭前夜合讓妍姿
炎方只愛絲穿候芳信居然兩地知茉莉亦
暮開

亭亭玉立冠芳藂浴罷華清倦倚風啓秀不愁春晚晚
緘情爲待夜瓊瓏高臺行雨應通氣宿鳥收香更觸籠
要與天葩爭六出請看聚雪月明中

無雙亭畔覓靈根種玉田開代返魂慣向酒酣呈皎潔
劇憐香燼送溫磨含苞似避宮槐影獻笑常依璧月痕
試織槿籬憑護惜芳馨更迭伴朝昏

斜陽淡抹瑣窗深清供疑分蘆蔔林簾下卸妝風冉冉
檻前迎露夜沈沈無心報喜隨金粟作意雕華象玉簪
我已散花忘染著曉衾還被暗香侵

半斂花房蝶夢催含香正喜夕郎回從教寶玉名朝采
爭似靈芸字夜來如意舞時釵朶散辟邪笑處枕屏開
廣寒曲按霓裳破珍重傾心比蚌胎

園葵側足送驕陽脈脈冰心吐暗芳染色已教空北地

吟情應遣候西廂晴烘爲怯蜂衙鬧露警翻憐鶴夢長
最是香苞初遶髻背鐙牽惹捉迷藏

漠漠梨雲仙路賒且同紙帳伴梅花素娥池影窺中夕
碧玉瓜期笑小家杯泛擬歌將進酒鬢添旋趁後棲鴉
女郎詩體從輕薄冰雪肌膚絕點瑕

銀缸照眼傷疎櫺誰綴搖風九子鈴蛩語漸繁催破萼
螢光乍點似懷馨六時半逐空花幻一枕休耽夢草靈
恰聽暝鐘和梵唱曼陀香雨憶蓮經

八月初吉赴詹事府祭先聖禮畢與諸公飲福

紀事

儒宮釋菜憶司存解褐終身傷

聖門

姓初仕國子學正每月預釋菜

之禮及官翰詹兩署又皆得祀先聖例於春秋二仲月朔舉行

預擬上庠陳俎豆略依

同社燕雞豚醪金共檢承前例飲福還均逮下恩自有

和羹分啜便陳平妙手不須論

頻年少學俸充公皆同官醪分辦祭祭畢飲福

而不分胾是日僕隸並得充飮

九日同游萬壽西宮登斗母閣還過法源寺訪菊

歸飲旭莊寓呈諸公索和

昨歲共登高東城偏阻雨投轄幸逢陳停杯忘歎杜

未癸

九日期至萬柳堂不果遂賞雨於雪園宅

勝賞在今秋良辰淨天宇游興蚤

飛騰前期俄舛午不緣庖可代那得萍終聚

企山輪值雅集以庖

人得疾中止旭莊乃越次代之驅車請何嚮傍郭隨所取南嫌窯廠喧

西憶壽宮古凌霄開傑閣運斗禮仙姥四際影皆圓一

窺容盡俯舊句費雕鏤新情怯覩縷辛巳九月游此有詩還疑釣

天近自有清音吐時有別客吹簫度曲小憩聽悠揚幽尋增鼓舞

迴瞻祇樹林更飲法源乳穿徑度槐門庭中盤槐作門栽盆羅

菊圃金英未勝摘石瓠聊可數題餽謝詩豪食餅羨僮

父去矣背殘陽歸歟酌芳醺花豬玉肪截稻蟹金膏剖

膾腴每偏勸割炙豈強賭本慮壑難填何期腹堪挂宿

戒擬咄嗟老饕嗤莽鹵不教犀筋空應煩翠眉嫵娛游

真快意得失匪逆觀坎止竟流行反客乃成主飲啄信

前緣銓衡類超補

旭莊時方需次借以戲之

妙理酒憑參清談掌資

撫承前詠嘉節及此換新譜作賦有羣公爭先愧貪賈
他年尋曲折旁說足參伍浙瀝引商飈連翩佇鴻羽

和句山憶花斷句八首

醉影低昂水國秋西風催送織烏流放生池畔當年種

曾祝花神酌玉舟

芙蓉

西湖放生池極盛

天香初滿月輪斜金粟還堪助點茶最是恩恩文戰急

飄來不減在山家

桂

遙憐蜀錦委塵沙八月春忘秋氣加人巧借留新樣好

般般爭學海棠花

秋海棠

一名八月春見羣芳譜

一花五葉記會開結果元依般若臺梧雨竟同蕉露滴

正須草木狀分來

甘露花

一花開五葉結果自然成達磨付法偈也原注謂此花會稽戒

珠寺有之樹類梧桐結子亦類桐子乃芭蕉別種非梧桐也花作五瓣落則更開裏一層云云於草本木本終莫之辨

砧杵催人補綻袍愁心那敢笑寒號授衣花樣天公定
不獨春風似剪刀

剪秋羅

小叢漫與綠天連爲倚紅妝鬪盛年何處覓將甘露飲
空餘墜粉伴池蓮

美人蕉

絲鞦緩拂掩啼妝擬贈金夫折柳長未識此花空有句

謝庭風絮共飛揚

金鞭子

素不聞有此花詢之作者也復未見但云姪女曾有一律詠之

似向垂枝認寶苗幽香細細度中宵牽情更有花田種
銀燭還應各自燒

晚香玉

九月下旬到園卽事成詠

柳枝蕭瑟舞腰低衰草交頭掩舊蹊幸有蜀葵留弩末
小花開到與檐齊

四面疎櫺一半通僕夫也怯破窗風裁量尺寸殷勤補
惜紙還能諒此翁

敗牆爲宥東坡楮開徑誰憐仲蔚蒿飯罷率先同翦薙
不須僮約絮王褒

莫訝宵來望轉空歸鞍不恤曉霜蒙惟應舊雨常相逐

送罷興公見孟公

虛船先生蚤過句山亦旋至

承 皇四子補示留別之作依韻奉答

羽騎蚤騰趙講帷方寂寥從田歲于邁倚席非閒拋雁

斷慨無望蛩吟同不聊

別後竟未得信

紅橋乍迎候遠認霑霜

袍款語費羅縷新篇工刻雕坐來一編擲讀罷興轉豪

就中感投贈勝得王祥刀端居事讎校同志隨嬉遨但

領靜中趣本無憂可消盆花助清供吟賞踰中宵重陽

例登眺雲路思招邀寸心儻不隔千里良非遙寫真有

佳句如影常依標父子飭家計約略能科條

姓在家情事詩中摹

寫略

備 乃知雲龍契不獨愈與郊全帙佇刪潤此韻催胥

鈔却話別來事經書

天語挑課詩更暇整

途次奉旨挑背說

卦傳第十一章面說

重陽七律限韻一首文陣凜不囂茲行信安穩安穩兼

吾曹鹿脯幸分餉屬饜憐貪饕微嫌弄麀喜

皇子歸日卽得

皇孫對賀者有去時

逐鹿回日弄麀語餘瀝忘投醪清談味嘉旨應作醅

酬澆重參元圃會況聆白雪高有倡苟無和俛眉增鬱
陶才力迴難副擁劍輪偏螯還期灑珠露借潤迴枯毫

封印日雪

講幄恩恩課雪車寒廳鎖印強排衙今年恰喜占三白
此日還須判五花暫就地爐供炙硯只貪玉屑助烹茶
寄聲滕六天符少趁臘催將一尺加

靜廉齋詩集卷九終

靜廉齋詩集卷十

仁和金 牲雨叔

正月初八日 重華官侍宴聯句恭和

御製重華官曲宴內廷大學士翰林等雪象聯句並成

二律元韻

乙酉

重華穀旦敞瑤筵拜手彤墀傍細旂瑞協太平瞻有象
吟聯中禁荷分牋三清茶 賜先春日七寶裝看入貢
年側聽 天歌增喜氣仙韶隨律應虞絃

卽席抽毫許載賡層霄卿喬影承迎璿官乍啓珠璣璨
玉琯新調絲竹清乙木乘春占德普需雲布澤與時行

祇慙蹲伏同牙獸率舞無能愜 聖情

是日 上御重華宮召內廷大學士翰林傅恆劉
統勳阿里衮陳宏謀于敏中舒赫德阿桂彭啓豐
張泰開裘日修王際華錢汝誠觀保蔣驥寶光鼎
奉寬金甌陳兆崙汪廷璵倪承寬劉星煒李中簡
盧文弨汪永錫等二十五人 恩賜茶宴又傳
旨賜飲三清茶命同賦雪象聯句七言排律六十
二韻畢續發 御製七律二首命卽席和進其分
用之硯卽拜賜捧出仍加賞畫卷小荷包各有差
臣等得欵硯一方
小荷包一對謹記

陳居中百靈銜渡圖

精騎後追前阻水不仗神靈無脫理遙呼河伯外孫來
魚鼈成橋撇波起畫師傅會祇誇多羽毛鱗介俄雲委
一龍便已勝虹梁寧待填河徵鵲喜荒怪元知不足憑

駭目飾觀聊爾爾前人題跋總茫昧參訂異同繙舊史

夫餘壤土入句驪朱蒙事與東明似聲之轉也

謂蒙字與明字

之訛

謂朱與東

先後流傳滋譎詭遂令亡命島中王冰合滹

沱堪比擬却嫌冰合尙非奇百靈銜渡關如此

春分日回城志慨

節過驚蟄還餘雪閨逼春分未見花

明日入閏二月

游客緩教

攜簪榼農占蚤許祝篝車趨班乍息雙輪轉休沐何嫌

五日賒

時出郊纔五日

不是經帷足閒暇誰從寂寞想韶華

自題聽濤圖

并序

句山樂泉各延畫師邀余寫照布景名圖殊窘應付屈

指廿五年中兩度寓澄懷園聽濤佳趣依然而聽濤亭
僅留荒址借此識之亦以寄余蹤跡圖成聊系一絕時
樂泉方屬題拾得像故次作牽連及之

仙園邱壑記曾經天半濤聲斷續聽偏強蒼官元好在
童童葢影當虛亭

聊憑善友現三身可是栽松願力勤拾得故應嗤小果
圓通未證證聲聞

和句山謝餉醉螻韻因以挑之

螻壘擬連山一鏟動盈百孖見便稱珍何妨寶燕石獮
殼倣雕牆長繞珠孃宅餘膏滲箬籠聊餉玉堂客芳潤

借糟邱居然起枯瘠幸比染菴羹寧須飽雞蹠憶從擘
蜡後詩壇久堅壁有時窺鳳飢不免應鴟嚇被撓忘二字
並去聲烹鮮遇毒恐噬腊饒君雋味嘗快我首功獲

句山以酒盡告疊前韻要作

杜老飲窮交贏錢限三百若邀淳于醉未足滿一石孟
公尊乍空遠取仙姥宅隔牆承借問素不辨主客欲遣
形神親詎分秦越瘠沿溪送羽觴曲河通遠蹠君應顧
之笑繡佛迴面壁爲同飛鳥憐抑懼飢彪嚇所愧螭房
傾佐飲乏海腊詩墨儻重開炙鮮還賞獲

句山以一壺相報而詩尙未答再疊前韻獻嘲所

謂不發苦詰不聞甘對也

詩酒久相麀君常一當百清篇醒我醉佇聽發金石却
緣渴吻濡喜氣滿大宅一壺千金重持答閉門客徵吟
偏袖手疲曳困磽瘠得無新學步徒望前人蹠更欲倣
當爐藉救四空壁書亡懶不補石斷應遭嚇荆璞總韜
光隔囊猜鼠腊願激不平鳴孰云毋固獲

句山疊韻二篇見答意在乞停願託移家以謝稽
緩兼責前餉涼薄皆枝辭也適有餽海蟹者厥
狀甚異分一送之三疊前韻附柬仍索和章

珍禽隱深藪不畏鷺鳥百躍也或激之妙喻水投石半

世寄萍蹤浮家還泛宅藉欲緩詩逋寧堪謝惡客勇怯
竟何常狔肥傲牛瘠薄少任苛求世固鮮廉黷空言愧
賓戲餘照借鄰壁海蟹虎斑瘠瘡鬼足驅嚇品居蚶蠣
上侑酒美魚腊好句儻無酬捧硯笑童獲

句山旣答送蟹作聞復有醉蛤之餽苦禁侑詩僕
未肯唐捐蛤去仍四疊前韻隨之聽所自處

猛士雖帶傷踴躍且踰百君才捷飛彈詎作不轉石釣
詩憑海錯掩雋蛟龍宅旣邀豪山守仍進橫行客介蟲
肉減骨互物腴勝平瘠舖糟鮮蛤嫩笑口似開醺酣飲
便揮毫沈思寧踴壁歷險倍驚奇巖探前後嚇勿憂少

陵瘦幸未比人腊袖手但收禽故應慙育獲

句山移居三日而得第四孫五疊前韻奉賀

海物瑣且蕃厥祥占則百雛鳳集孫枝少男爲小石美
哉吉語聞恰逢新入宅克家驗包蒙賀厦續殘客擬草
弄麀書古肥雜今瘠不如還趁韻鬪腕兼抵蹠易幟慣
爭奇潛軍突空壁寧爲阿翁累聊博笑嚇嚇幾時湯餅
會列饌備鮮腊煖熱速賓朋膏潤速臧獲

段生心榮

貴

輓詩

余王申江右所取士以廣文需次縣令卒於京師有母年七十

八矣子匡時扶輿

南歸詩以哀之

劒光曾識斗牛間歎息文昌福命慳佇聽琴堂流雅韻

空教鱸席掩賢關，慈親尙作門間望。孝子誰憐跋涉艱，
愧我臨分徒贈淚。哀詞吟罷鬢添斑。

恩賜鄭宅茶恭紀

曲宴三清記拜嘉

正月侍宴
賜飲三清茶

頭綱又

賜社前芽抄

來雲子容餐素煎出琳腴，試泛花風味卽看推鄭宅。月
明殊勝到盧家，講帷常恤相如渴。歸夢龍泓路轉賒。

喜汪壻

日章

登科

硯會傳壻亦前緣，攀桂還同我昔年。便許乘風催破浪，
不須晚歲驗良田。娛親最喜科名蚤，相士應知器識先。
謾說冰清齊玉潤，待看比德定誰堅。

壻年廿二與余鄉
舉之齒正同余登

第殊晚故以蚤達期之
且所望不僅在科名也

避暑山莊謝

恩 賜對恭紀

山莊中謝日咫尺 玉音宣江右人文盛名家勝國傳

振興資汝力誦法繼前賢士習期端本民風待率先毋
令弄刀筆但遺守丹鉛校藝雖分寄持衡要獨專勞心
身乃逸假手弊難蠲職業勤申儆泥塗記在擬傳臚曾

舉首擊磬正謀篇

蒙 上垂問你就是做
子擊磬於衛底會元麼

拜手 溫綸

奉當頭日鏡懸謬兼簪筆任敢忘紀 恩編彝訓敷言

重銘心藉省愆

省墓得請紀 恩志痛

卅載松楸隔中宵夢不寧陳情徼 主鑒餘慶感先靈
驛路霜華白鄉關山影青何人同捧奠未到涕還零兄弟久逝兩子亦不獲從

常州示三俊

渡江過揚州喜汝蚤迎候三載離我旁氣象幸如舊汝
料我行後盡室方南來豈知事大謬翻遣汝北回回頭
顧汝姊意亦頗驚訝且復挈羣兒拜跪參差罷平山諸
勝境何暇扶筇登冒雨放船去攜汝歸毘陵汝婦謹修
容始見阿翁拜汝女蹴紅氍側匿殊狡獪非貧偏出贅

有子還寄生慙愧親家甚更以華筵迎酬酢禮宜之夜
久雨仍急聊寄飲醉心燒春一杯吸歸途逢笨伯謁入
重相邀語多不可了決去如蛙跳衝泥就篷窗漏鼓已
過二命汝留妻家本爲促裝計汝旋尾我至固請從南
行南行誠得策寧待汝發明從我到西江規模正草草
汝雖欠精細亦足助稽考從我到家鄉辭家垂卅載因
叨上冢榮特多舉火待乾餼儻責望期汝少彌縫宰木
偶憔悴示汝勤培壅況我迫衰年疾疢亦時作連宵苦
胃痛汝見久錯愕我不汝舍意卽汝戀我情抑情遣汝
去勢固有重輕南北同奉親何事淚痕溢汝兄送我時

有淚不敢出

嘉興晤陸根堂

樹本

前輩聞范九池

咸

同年歿於

粵東杭城唯夏果田

霞

國學在葢昔年叢碧樓

同學止三人矣感賦一律奉呈

不意成良覲推篷眼共青正欣來舊雨又報落晨星珠
海誰相送駕湖復幾經歲寒三友在叢碧轉凋零

省墓述事八首

去鄉三十載還作故鄉客地主重王人城闔張赤帟肅
請聖躬安徐分主賓席郭外本吾家環觀俄壘迹竊
歎昔鬚髮於今遂全白我方謹酬對旁聽亦心惻禮成

旋別去神往北山北

先墓俱在北山

未敢傲邦君報謁及今夕

今夕曾幾時明晨乃周歷低顏逐冠蓋虛籟警松柏何

以對先靈炷香宗子宅可憐人事擾尙與墓門隔

吾族始遷杭及余踰十世祖墓圯江濤五代儼鱗次

始

二世祖墓在慶春門外明代皆圯於江自三世祖至高祖凡五代皆葬青芝鵑先祖師宗公墓亦附焉芝

鵑接磚街

會祖興化公葬磚街嶺距芝鵑半里許

鍾祥知有自高曾暨吾

祖相望無多地宰木幸敷榮松球尤晚翠

師宗公墓上松枝蟠結成

球大如栲栳翠色鬱然聞已十餘年矣

親盡少餘哀吾祖嘗逮事

祖歿時姓八歲

昔未定今名泣告士瑛至

姓幼時名也

初至尙征衣禮服祭

時備列拜族人稀近惟曾祖派

今族人皆曾祖下親伯支此外僅三人耳

伯

祖實親支始營窀穸計兄弟得因依子孫仍夾侍

伯祖爾陶

公浮厝幾八十年近始爲卜葬從伯秦徵公從兄谷芳皆附焉與芝鵬磚街並在一里之內

仰承祖

考心兼慰高曾意祭掃傷先塋魚菽致殊易假我更睽離庶幾憑代匱

祖塋無隙地普福開新阡永惟先考妣葬自丁巳年麻

衣遽出走不待封樹全登朝屢奉使兩傷江湖邊

壬由江西

甲戌

從役頗閒暇乞假常遷延焚黃亦再舉

贊善詹事任內兩遇

邀覃恩得贈典

寵命承便蕃祭主竟何在及今始來旋慙顏

迫深痛難假淚涕洟雞豚已不逮羊虎何時鑄兆域坐偏八展拓嗟無緣若教地脈蹙能保先靈安治命在曲

體阿兄蚤從權支婆重卜宅別

必

爲支子先

謂庶母馮孺人不及

神事

於義苟非順敢辭不孝愆拜起顧子弟幽顯聞此

言

兄弟各西東在原應悵望三喪先後舉僅一得歸葬

大兄

力薄愧兼營手足如被創遺孤多幼小近亦少

而壯養之實不足安問教之當酌酒祝幽宮此事在默

相儻復任蹉跎我死竟誰仗來朝奠阿姊支策佳城上

姊歸王氏初葬龍門山

諸孫侍其祖隨叔拱相向聞哭解同哀似

覺虎狔讓

授室甫六年琴弦遂中斷

壬寅娶元配王大人丁未產長女而歿

側想獨

眠人久辜同穴願當時助供養計日賣簪釧偏得舅姑
憐語及淚如霰九京勞侍奉我後子還先有女蚤從夫
羣雛方婉孌如何亦產厄

長女亦
以產亡

我到已不見嬌兒後

人育子在喜應拊長男俄天折却繞靈筵畔

三事厝
於側摘

來傷心賦彌切悼亡歎我亦無幾求孫枝望蕃衍苑枯
子所共諒不假祝讚泉下聚三星歲時餘麥飯

葛藟本根庇外家思渭陽禹航數十里

外祖嚴氏
家餘杭

時迫

空相望曾聞外王父鞋鳴留堂防後來三舅氏未識體
魄藏聊憑表兄弟分往陳清觴嗟余兩作贅寄居恩義
長湖山及郊郭瞻拜同徬徨仍世重母族慈恩齊義方

正可示兒輩惜哉不得將

古人類輕財物力亦充足過家上冢便千金散親族我
今寧辦此要必慰其欲親疎各差次貧富審誰孰佐之
以尊酒撮舉通款曲得古什二三幸已免喧譁

到家且旬日晝夜殊草草久留終少暇決去亦旋了王
事有嚴程詎堪常膠擾重來松楸側心痛劇於擣行年
六十四卅載夢魂繞此去復幾年故知來日少瞻依未
足喜辭別那可道便疑成永訣歸骨已枯槁慈顏實臨
鑒緬想定憂惱儻蒙餘慶在幸遂乞身蚤山林任疎放
墳墓永相保淨居依丙舍餘力樹阡表奢願恐難酬佑

之惟祖考

湖墅望舊居感詠

舊居在長板巷橋名長板橋今雨堂名始於此新亭則園中亭

名也時姚氏邀余
題主故驕從過之

先業能堪幾度拋
板橋東畔記安巢
當年擬割三間屋
此日誰留一把茅
客散新亭空悵望
詩成今雨幸傳鈔
鳴騶未免驚鄉里
定有移文爲獻嘲

拜辭 先墓已復至王夫人殯所是日爲十一月

十七卽其忌辰三十九年
恰逢茲日愴然有作
生死悠悠四十春
知君泉下淚霑巾
何期此地重來日
恰值當年化去辰
厚夜且攜兒作伴
幽宮佇卜女爲鄰

方擬移厝
長女葬所我今亦少團圓趣抖擻征衣只一身

入七里灘望釣臺

桐江西上兩厓開催放扁舟入峽纔風信有無占七里
諺云有風七里
釣竿來往認雙臺

東西二臺對峙

天寒我亦披

裘坐市遠人方買菜回山水特因高士重灘前頻作客
星猜

過灘有省

灘水見底清灘石密於鰓石高常激水水石自相鬪正
如狷介人遇物少容受扁舟犯其怒呼洶宛遭詬船底
耐磋磨勝揉皮革就不然久破碎何暇補穿漏故知柔

克妙舌壽踰齒壽篷窗增鑒戒見到量難副

上饒舟次喜雪

江行得微雪畫本見亦僅樹色與山容淺深憑巧覩孤
村冷朝炊煙縷渺斜引驚禽背人去沙岸跡留印灘稀
聲漸緩風水兩俱順何以紀清游弄筆韻徐趁舟如同
隊魚逐浪參差進颿迴帶霏雪飄瞥點衰鬢

靜廉齋詩集卷十終